

普法戰史講義

第一章 戰爭之原因

當一八〇六年，普魯士遭法帝拿破崙第一蹂躪，軍隊破滅，國幾不國，普魯士人民，莫不切齒痛恨。普王威廉第一，生長於大戰紛亂之中，嘗目擊普國宗教蹂躪於法軍鐵蹄之下，對法怨恨之情，深入腦海。卽位而後，銳意圖強，常懷統一德意志，懲挫法蘭西，爭霸歐洲之大志。迨一八六三年，大破丹麥，一八六六年，更大破奧軍，德意志聯邦，殆告統一，然因法國佔領萊因河左岸一帶，離間南北德意志之聯合，更使威廉第一覺悟非擊破法國，則其所企望之目的，無由成功。是故普國君民，與法干戈相見之決心，久已上下一致。

時法帝拿破崙第三，頗以歐洲盟主自居，目覩普魯士之勃興，甚爲妬恨，及聞普軍侵入奧國，卽欲舉兵助奧，卽因普相俾士麥允割萊因河上流之地，以爲法不助奧之報酬，遂爾中止。蓋法帝之意，以爲普敗於奧，則普之勢富不能敵法，以法之軍隊，佔領萊因上流之地，當屬易事，普勝，則普旣以其地許法，法國當然坐享報酬。

，無論普國勝負，於法均屬有利，而不知其已入人彀中也。及普既破奧，拿破崙第三遣使至普，請求履行前約，俾士麥乃傲然謂其使者曰：「貴國欲取萊因上流之地，請任意自取之，吾不敢從貴國之命。」於是拿破崙第三知爲所愚，憤火中燒，恨普之心，更爲深刻。加之當時法國國民，對於拿破崙第三之政治，頗生厭倦，自由共和之論，漸囂塵上，紛紛擾擾，勢非激起革命不止。拿破崙第三欲轉移人民目標，使其鬱結之氣，向外發洩，以杜內亂，其向普挑戰，此亦一因也。

一八七〇年，西班牙國內大亂勃發，女王伊薩伯拉棄國出奔，不知蹤跡，是年七月四日，西班牙人決迎普國霍亨索倫王室之雷普爾爲王。法人聞之，大爲震動，深恐普國王室，出而統治西班牙，於法必將有大不利。蓋普魯士若與西班牙均歸同一王室，則無異曩昔查理士五世時代，法國必有腹背受敵之虞也。其時法外交部長古拉猛爵士對於此事尤爲痛心疾首，力言普國王室，若爲西班牙王，則不特墜落法之國勢，且有損法之國體，主張要求普王命其王族，勿爲西班牙之國王。七月八日，法政府乃命其駐普公使白勒德齊晉謁普王威廉，要求勿令其族即西班牙王位。時普王威廉第一適避暑葉姆斯，Fus 法公使復往葉姆斯，晉謁威廉，面呈法帝拿破

崙之書翰，陳述上列意旨，且希望勿傷普法兩國之和平。不料竟遭普王威廉嚴詞拒絕，竟謂：「霍亨索倫，吾輩之同宗也，以分言之，則爲族黨，以義言之，則爲君臣，今西班牙選之爲王，實一國之公事，決非一家之私事，吾輩焉有阻止之權。」法使無可如何，乃告辭而退。閱數日，再行晉謁，反復傳達法政府之意旨，竭力請求，普王重述前言，仍謂「非吾輩之所與聞」，始終固持其說，不爲稍動。

既而雷普爾察知普王與法國間之情形，自動辭退王位。乃法政府猶以爲未足，致書普國駐法公使，要求再由威廉致書拿破崙帝，保證今後決不令霍亨索倫家同族即西班牙王位，且對此次事件，表示悔恨之意。普相俾士麥以法國來書，頗屬無禮，擱壓手中，不予上奏。法國公使白勒德齊知之，以爲俾士麥從中阻格。一日，威廉適在別邸院中散步，法使遂親至其側，面陳法政府之希望，威廉不特不聽，且毅然決然謂之曰：「今後關於此事，一概不與貴公使面談。」翌日，法公使將會見普王情形，報告法國政府後，法政府即命公使白勒德齊迅速下旗歸國，同時普國駐法公使，亦遵普政府之命，離法歸普，於是普法戰爭，從此開幕矣。

普法之戰，自表面觀之，法國似爲主動。其實法國不過妬忌普國漸次勃興，欲加

以抑制，同時欲使本國激昂之民心，移轉向外。故法與普戰，自始即爲孤注一擲，居於最危險之地位。所謂不勝於外，則敗於內，胸中固無必勝之成算也。反之，普國，則自始即抱主動的主義，厲行兵制之改革，力謀兵備之充實，又復與俄締盟，與奧棄怨，抒其後顧之憂，俾得舉其全力以對法。蓋當未戰之先，而勝敗早決矣。

第二章 開戰前德法兩國軍制之大要

第一節 德國軍制大要

一、兵役。

普魯士自一八一五年，即實施全國皆兵之主義，規定出陣兵由常備兵與後備兵編成。及一八六一年，普王威廉第一卽位，更加革新，益臻完善。

北德聯邦，自普奧戰後，其軍事上諸般之關係，一以普國爲基準，規定齊一。南德諸邦，亦準北德之制度，從新規整其編制與動員。

普軍於普奧戰後，新編第九第十第十一三軍團。又將薩克遜軍團，及黑塞二軍團，合併，編爲第十二軍團，及第二十五師。

二、教育及戰法。